

毋識見怪愛學精 江秀鳳(四縣腔)

麥當勞在佢小學時節打入台灣市場，大家就 jiojio 滾歸屋下人共下去食看哪，麼个安到麥當勞，佢兩姐妹乜要求吾姆渡佢兜去食看哪，莫分同學笑佢山精毋識見怪，毋過吾姆錢銀總係算等來使，毋會儘採就渡佢兜去，該央時學校係月考制，佢講月考考忒正做得去。等考試考忒，無議論愛考幾多分、幾多名，吾姆講有盡力就好。

毋過吾姆食齋，麥當勞有規定做毋得帶東西入去食，又還愛算人頭，有盡少消費正做得个規定，吾姆攞一隻飯包仔，摺櫃枱細阿妹仔講佢食齋，麥當勞無賣齋个，故所自家帶飯包來做得無？該細阿妹仔還走去問店長，正分佢兜過關點餐，頭擺麥當勞賣歸組仔个餐當貴，吾姆試著有義務分佢兜出去社會多看、多行、多見世面，有奇巧个東西定著會渡屋下人去遠奈，毋識食過个東西，特別好食，到今，一生人就還記得麥當勞个味緒。

吾好朋友阿雅个阿姆，頭一擺渡佢共下去牛排店嚐牛排，吾屋下毋識食過，等服務生摺牛排送來个時節，盤仔頂頂有一隻蓋仔，蓋仔打啊開來煙沖沖仔，醬料涿涿滾緊噴，阿姨教佢同一條白色个布仔拿起來擋等衫，毋好分緊噴醬料个牛排摺衫噴屑糟，又教佢右手擎刀仔，左手擎槓(qiam\)仔，切一坭食一坭，定定仔食，佢學已遠，一口一口仔食，牛肉个味緒有牛奶轟，正經當香當好食，咬落嘴還會承牙，食恁大人自從毋識食過恁好食个肉，實在還享受哪！切著一坭有嫩骨个所在，硬切就切毋開，鋸當久，下後就大大力切落去，刀仔切著盤仔个聲當大聲，歸間餐廳个人都有聽著，佢試著還敗勢哪！無想著該坭牛肉續噴出去，噴到隔壁个桌頂，該桌个人做盡翻轉頭來看佢，害佢面紅濟炸像恩主公个面恁紅，還失禮喲！阿姨遽遽企起來去同人會失禮，好得無噴著人，倒轉來就同佢ten手切一坭，當溫柔个喊佢食，佢又講，伸个無骨頭了，你頭下切到當好，無相干好好享受若牛排，毋使掛意，阿姨同吾姆共樣性體一等好。

轉到屋下，同屋下人講這件事情，分佢兜笑到這下，吾姆講 en / 客人旦旦係耕種人，盡惜牛仔，牛仔對耕田人恩情當大，喊佢下二擺點豬肉抑係鷄肉，莫食牛肉較好。

這兩擺去食毋識見怪个料理，分佢印象當深，乜學著當多去餐廳食飯个禮節，雖然有見笑个過程，下二擺就毋會出差世分人笑了。

2018.5.31 台中 55 路公車頂